

سناء سيف بعد الحكم بحبسها : "هاسلم نفسي .. تعبت"



الأربعاء 4 مايو 2016 02:05 م

قالت الناشطة الحقوقية "سناء سيف عبدالفتاح" أنها عازت على تسليم نفسها لسلطات الانقلاب بعد حكم ظالم جديد بحبسها بتهمة إهانة القضاء

وقالت نجلة الحقوقي الراحل "أحمد سيف الاسلام عبدالفتاح" وشقيقة الناشط المعتقل "علاء أحمد سيف عبدالفتاح" قالت عبر حسابها الشخصي بموقع فيس بوك، نصا :

"طلع ضدي حكم غيابي بالحبس 6 شهور مع النفاذ في قضية اهانة موظف عام انا في طريقي لقسم السيدة لتسليم نفسي من امبارح قررت ماروحش المحكمة، ولو صدر ضدي حكم مش هاعمل معارضة أو استئناف، وهاسلم نفسي للتنفيذ هاحاول أشرحلكم ليه وصلت لكدة"

2011 الجيش قبض عليا في أحداث مجلس الوزراء، واحتجزت واتضرت في مبنى مجلس الشعب بعد ما خرجت اتعرفت على صورة لظابط من اللي ضربوني وقدمت بلاغ بصورته، والقسم بعطني للمستشفى عملت تقرير طبي وفضلت أمشي في الإجراءات دي حوالي سنة ملف يتنقل من نيابة للثانية لحد ما راح لقاضي التحقيق فيديوهات مراقبة بعد ما شفتها في مكتب في وزارة العدل تختفي في النص التقرير الطبي يضيع فنذور عليه في الأرشيف، بعدها ب 10 شهور يطلبوا كشف عليا تاني، لحد ما الملف اتركن وأنا زهقت بعدها ب 3 سنين في نفس الواقعة، ألقى المتظاهرين هم اللي بيتحكم عليهم بتأييدات!

2014 شاركت في تنظيم مظاهرة ضد قانون التظاهر واتقبض عليا اعترفت للنيابة بتنظيمها لإني مقتنعة ان التعبير السلمي عن الرأي حق دستوري في الآخر تهمة التنظيم اتشالت واتحكم عليا أنا و22 غيري بالسجن على تهم تانية ملفقة (أكياس مولوتوف، تخريب ممتلكات ..) مع إني معترفة بالحقيقة

في كل اللي فات كنت باتعامل مع "منظومة العدالة" بجدية، وفي المقابل ألقى وكيل نيابة بيقول لي "أنا مش عايز احبسك بس مش بايديا"، وقاضي بيسأل "فين الحبس الاحتياطي ده؟" وأنا محبوسة قدامه قبل الحكم

بعد ما جريت اتعامل معاهم مرة كصاحبة حق ومرة كمتهمه، دلوقتي مطلوب مني تاني العب دور المتهمه ومطلوب من المحامين يستهلكوا طاقتهم في الدفاع عني أنا المرة دي مش لاعبة، لأنني ببساطة مابقاش عندي طاقة اتعامل مع إجراءاتهم دي مش فتحة صدر، الحبس مش سهل وأنا عارفة ودخوله تاني أكيد هيبقى أصعب بعد ما رجعت أشوف أخويا وعوضت فترة غيابي وشديت كويس في شغلي لكن طالما هم مصرين يورطوني وكدة كدة هادفع التمن، أدفعه وأنا شَبّه نفسي

المحامين .. زملاء وتلامذة وأصدقاء بابا أنا آسفة اني المرة دي باطلب منكم ما تقوموش بدوركم؛ الدور اللي باحترمه جدا أنا اتربيت في بيت محامي حقوقي وشفت ازاى بتعاملوا مع شغلهم بتفاني وجدية ولأنني باحترم دوركم، وباحترم القانون، فضلت - على الأقل لمرة - إني أعفيكم وأعفي القانون من الإساءة دي".

طالع أيضا : [قضاء الانقلاب يقضي بحبس "سناء سيف" 6 أشهر بتهمة إهانة القضاء في أول جلسات المحاكمة](#)